

Жарқын болашақтың жаңа оқулығы

Ы.Алтынсарин атындағы Арқалық мемлекеттік педагогикалық институтында Ақпараттық кітапхана кешенінің ұйымдастыруымен «Жаңа гуманитарлық білім» оқулықтарымен профессор – оқытушылар құрамын таныстыру және оқу бағдарламасына енгізу мәселесін талдау» тақырыбында семинар өтті.

Семинар барысында «Қазақ тілі мен әдебиеті» кафедрасының оқытушылары тіл мен әдебиетке, яғни 6В01701 – «Қазақ тілі мен әдебиеті» мамандығына қатысты жаңа оқулықтармен жан – жақты таныстырды.

Атап айтсақ, аға оқытушы Бақыткүл Ағзамқызы Таути-на Джули Ривкин мен Майкл Райанның редакциялауымен құрастырылған 4 томдық «Әдебиет теориясы» антологиясының төрт томындағы қарастырылған өзекті мәселелер жайлы баяндап берді.

Оқулықтың I томында структурализм, постструктурализм, лингвистика, нарратология, феноменология, эмпирикалық зерттеулер бағытындағы құнды пікірлер мен тың көзқарастар топтасқаны жайлы айтылса, ал II томында постструктурализм ағымын жан-жақты саралауға арналған философиялық толғамдарға және оның әдебиетпен, тіл білімімен, пси-

хологиямен арақатынасына арналған. Францияда пайда болып, АҚШ және неміс ғалымдарының зерттеулерінде көбірек көрініс тапқан постструктурализмнің қайнар көздері, оның жеке ағым ретінде өрістеуі әдебиеттегі трансгрессиялық, яғни бұзып-жару идеяларымен астарласа зерделенгені және жазу мен сөйлеудің байланысы, таңбаның классикалық теориясын жаңаша пайымдау, бейсаналық пен тіл, автор мен шығарма сияқты күрделі мәселелер кеңінен қозғалатыны туралы жан – жақты мазмұнды мағлұматтар беріп өтсе, кафедрамыздың аға оқытушысы, педагогика ғылымдарының магистрі Гүлжан Кенжекейқызы Айдарова швед ғалымы Торе Янсонның «Тіл тарихына кіріспе» атты еңбегіне тоқтала келіп, автор бұл еңбегінде тілдердің қалай пайда болып, қалай жоғалатынын айтып қана қоймай, болашағы жоқ тілдерге де тоқталғанын және кітап негізінен лингвистика және тарих факультеттерінің студенттері мен оқытушыларына арналғанымен, тілші ғалымдарға, тілдердің тарихына қызығатын көпшілікке де қызықты екенін баса айтты.

Сондай – ақ, кафедрамыздың аға оқытушысы, магистр Ардақ Әмірханқызы Абдуллина ғалым Стивен Пинкердің «Тіл – инстинкт» атты туындысына тоқталды. Зерттеушінің «Тіл – инстинкт» атты бұл кітабы қоғамда қызығушылық тудырғаны үшін Америка пси-

хология қауымдастығының және Америка лингвистика ұйымының сыйлығымен марапатталғаны жайлы және бұл классикалық еңбек көпшілік ойындағы тілге қатысты сан түрлі сұраққа жауап беретіні туралы айта келе, оқулықтағы 2, 6, 9 бөлімдердің мазмұнымен оқырмандарды қысқаша таныстырып өтті. Таныстыру барысында ғалым Стивен Пинкердің өмірі мен шығармашылығын таныстыру мақсатында арнайы жасалған слайдтар көрсетілді. Жалпы, ғалымдардың еңбектері туралы баяндаған кезде қысқаша аннотациялармен шектелмей, авторлардың өмірі мен шығармашылығы туралы қызықты деректерге де тоқталды.

Кафедра оқытушылары таныстыру барысында тыңдарманын жалықтырмай, бір қарағанда тым күрделі болып көрінетін лингвистика ғылымын қазіргі жастардың көзқарасымен салыстыра отырып, әлемнің інжу – маржаны танылған кітаптардың мән – маңызын айшықтай түсті. Жарқын болашақтың жаңа оқулығы – білім алушылар үшін, әрі профессор – оқытушылар үшін де – таптырмас білім көзі болып табылады. Ғалымдардың еңбегі білім саласындағы жаһандық бәсекеге неғұрлым бейімделген мамандарды даярлауда септігін тигізери анық. Демек, 100 жаңа оқулықтың қоғамдық сананы жаңғыртудағы рөлі ерекше.

**Ардақ АБДУЛЛИНА,
Ы.Алтынсарин атындағы
АрқМПИ доценті.**